



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Electoral roll ya NDA-i melungba
ama renemer: Hemant Soren

Bayer Leverkusen-i coach Erik Ten
Hag mapa nungi anentsüogo

VOL. XXII ISSUE NO. 319 (ADOK 319)

DIMAPUR

SANGTENNÜ (TUESDAY)

RONGJUI (SEPTEMBER) 02, 20: ₹ 5.00

Tanü nungi NLA monsoon session tenzüker; 'Satanic Worship' onük jembitsü

Kohima, September 1, 2025 (TYO): Anogo asemnü Nagaland Legislative Assembly (NLA) monsoon session Mongulbar nungi tenzüksü.

Taküm monsoon session nung "Prohibition of Satanic Worship in Nagaland" onük jembitsü lir anungji session tongtipang ka asütsü.

Naga Peoples' Front Legislature Party leader aser taoba home minister MLA Kuzholuzo (Azo) Nienu-i "Prohibition of Satanic Worship in Nagaland" onük benöksü .

Rules of Procedure and Conduct of Business nung Rule 54 kübok pai iba onük benöksü sentong lir.

State Assembly Secretariat-i Nienu dang iba onük ya "urgent public importance" ka ama züngokogo ta shidi züluba ka social media nung kanga prokshir.

Iba onük ya Mongulbarnü Question Hour sülen olemteptsü ta Assembly Secretariat-i MLA Azo dang shidi nung shia lir.

Nagaland ya Khristan tamangba yimsü aser sobaliba takang benshiba atema tetshir aser ibala onük ya Assembly nung benoka mejembidang. Iba jagi Mongulbarnü session ya kanga tongtipang asütsü.

Urban Development & Municipal Affairs Department Advisor MLA Zhaleo Rio-ia Nagaland nung mojing külemba inyakyim kanga buluba akümba atema kanga süoki ia bilemba metetdaksüogo.

Ibala inyakyim ya Nagaland nung Khristan tamangba yimsü anema lir, sobaliba tangatetba raksatsür aser lanurtem mashileni anitsü akok ta Zhaleo-i ashi.

"Mojing külemba ya asen libaliro den meputepba dang masü saka asen loktiliba tamendakdak atema lendong lir. Iba ya odang toktsüra kibongtem samatsütsü, tetsübu aser terata adokdaksütsü aser asen sobaliba tashimait kümdaksütsü" ta paisa

ashi.

Zhaleo-isa arogotem, kin hohotem, kaketshir teloktem aser lokti lennirtem dang kümdanga alitsü aser lanuputu kümzüka ayutsü atema mapatem inyaksü ayongzüko.

Paisa sorkar dang awareness campaigns ajanga mapa inyaksü, temulung melemba maparen nung tenük yoktsü aser mojing külemertem ozüing tesashi agi merenshitsü temepishiba agütsüogo.

"Ibala inyakyim ajanga Naga loktiliba nung telemba adoktsü aser yimjung mali kümdaksütsü akok. Anungji Nagaland-i tamangba nung ka küma longjemtsüla aser ibala lendong aketba inyakyim magizüksüla" ta Zhaleo-isa ashi.

"Iba ya otsüsütsü asütsü. Assembly mesüra Parliament nung mojing külemertem indang onük benoka jembiba ni kodanga mangashidang" ta senior journalist H. Chishi-ia ashi.

Anogo asemnü monsoon session ya Bodbarnü sodi alitsü aser iba session nung onük aika benoka lemsateptsü imlar ta Assembly Secretariat-i metetdaksüogo.

Tan session nung kin 5-i job reservation policy meyipa repringshitsü akhangba, Inner Line Permit (ILP) mapa inyaksü aser Naga yimten tebilemtsü onüktem benoka olemteptsü.

Ahead of the session, the Political Affairs Committee on Naga Political Issue of the State Government, composed of members from all the political parties, held a closed door meeting in the Chief Minister's Residential Complex.

Monsoon session metenzükdang state sorkari tentetba Political Affairs Committee on Naga Political Issue züngsemtem Chief Minister's Residential Complex nung senden ka menogo. Iba Political Affairs Committee nung political party ajak nungi züngsemtem lir.

Nagaland medical kaketshirtemi regularisation anema lungkak aiter



Nagaland Medical Students' Association (NMSA)-i tanü agi anogo ananübuba lungkak aitiba noksa nung angur. (Kohima, Sept. 01, 2025)

Kohima, September 2, 2025 (TYO): State sorkari contractual health workers 280 regularise asütsü merangba anema Nagaland Medical Students' Association (NMSA)-i tanü agi anogo ananübuba lungkak aitigo.

Ajisüaka, Health Department-ibo iba lemtet ya Gauhati High Court order ka sülen anidaka agi ta ashir.

Health & Family Welfare (H&FW) Department-i August 18 nü departmental screening committee ka ajanga medical officers, dentists, Ayush practitioners, aser nurses regularization asüba agizükba sangdong ka agütsü. Ajisüaka, NMSA-i iba anema lungkak aiter aser parnoki ashiba agi iba lemtet ya Nagaland Health Service Rules, 2006 anema lir.

Nagaland Health Service Rules, 2006 nung Class-I gazetted officer mapa ajak Nagaland Public Service Commission (NPSC) ajanga shimoktsü lateta lir.

Gauhati High Court nung Kohima Bench ajanga August 1,

2025 nü tetuyuba agütsüba ama Covid-19 mapang shimokba medical officer 98 regularisation asür ta Department-i Principal Director Dr Mereninla Senlem ajanga sangdong ka agütsü.

State sorkari special recruitment drive agiba anema NMSA ajanga benokba writ petitions benoka liasü saka itemji okadaki magizük ta Dr Mereninla-i ashi.

Department-i "one-time dispensation" ama departmental screening committee ka ajanga regularization lemtet agi aser ibaji August 18 sangdong ajanga mapa kümogo ta laisa ashi.

High Court tsüngdang nisung aikati ken o tem benoka lir aser iba ken o okadak alinung lungkak aitba sentong agitsü nüngdak madoker ta Principal Director-isa ashi.

"Department-i osang jangjashikaja onoki sangdong magizüker aser iba tetuyuba meyipa magi tashi onoki timi lungkak aittsü" ta NMSA president Pihoto S. Rochill-i ashi.

Lemzüka aliba mapa ajak

NPSC mesüra Nagaland Staff Selection Board (NSSB) nem agütsütsüla aser service rules nung lateta aliba ama open advertisement, written examination, aser viva voce ajanga shimoktsüla ta pai nenshi.

Confederation of Tribal Associations of Nagaland (CTAN) convener Meshenlo Kath-ia NMSA pusemba metetdaksüogo.

"Health & Family Welfare (H&FW) Department-i regularization mapa inyakba ya ozüingi memelar aser tim masü. CTAN-i iba maparen anema yaküm nungi ola adoker saka department-i inyakogo aser iba ya kanga tim masü" ta Kath-i ashi.

Tanü lungkak aitba sentong nung medical students tsüraburtemia shilem agi aser parnoki ashiba agi parnok temeten aser Nagaland nung medical education tarutsü atema adener.

Lungkak aitertemi placards aser banners amer shilem agi aser parnokisa ola adoka temeten meshia liasü.

RMSA-2016 tesayurtemi class nung shilem magii lungkak aiter

Kohima, September 1, 2025 (TYO): Okadaki "Equal Pay for Equal Work" tetuyuba agüjaka state sorkari ibaji mapa küma meinyakba atema Nagaland RMSA-2016 Teachers Association-i Hombar nungi lungkak aitba tanabuba shilem tenzüko.

Nagaland ajungalen RMSA-2016 tesayurtemi class magir aser iba ajanga reju 133 nung timtem ajurur ta batch president Imlitemjen Imchen-i ashi.

RMSA-2016 tesayurtemi küm 9 tema kaketshirtem tenzüja aruaka tanü tashi temeten mangur, mapang shitak nung itasen magütsür, aser parnok fixed pay nungi okadak senotsü endoker ta pai ashi.

"September 2018 nungi tesayurtemi okadak ken o benoker angadanga arur aser

okadaki parnok pusema oshidang aika agütsüogo. Ajisüaka sorkari item tetuyuba sülen anidaksü memulungba ajanga onoki lungkak aittsüsa akümer" ta Imlitemjen-isa ashi.

Okadaki tetuyuba agütsüba sorkari süoki ia magir. Onoki lungkak aitba ajanga kaketshirtem, tsüraburtem aser shisaliok nung tetsükdaksü ajuruba atema onoki kanga aria bilemer. Ajisüaka sorkari hao ta maliba aser okadak tetuyubatem mangaba ajanga onoki lungkak aittsüba dak alaka tanga lenmang kecha mali ta paisa shisem.

2016 nungi onok mapa agizüksüla, SSA-RMSA 2010-13 tesayurtem nem agütsüba ama onok nem-a ROP 2017 with annual increments agütsütsüla aser arrears magütsü aliba ajak agütsütsüla ta RMSA-2016

tesayurtemi takhangba agütsüshir.

"State sorkari August 14 nü Supreme Court nung review petition ka benokogo. Iba ken o ya tang okadak lir asünung department-i RMSA-2016 tesayurtem dang aremzüka atatsü aser lungkak maittsü mepishiogo" ta Samagra Shiksha Nagaland nung Joint Mission Director Dr. Kevizakie Rio-i ashi.

Iba ken o ya okadaki agizükogo saka anogo ano meshimtet lir. Tesayur nem ita asem itasen magütsü aliba agütsüogo ta pai ashi.

RMSA-2016 tesayurtemi August 25 nungi mezüngbuba lungkak aitba shilem tenzüker aser parnoki itasen magütsü aliba agütsütsü aser 2010 nungi shimokba tesayurtem den kasa itasen agütsütsü takhangba agütsü.

TENÜNGSANG AGÜTSÜR

Wb. Immonger, Wb. L. Bendangwati & Wt. Sentyangla na jabaso, pai District Sericulture Officer Mokokchung, jenjang tongtetba asoshi Kinunger senso ajak tenüng nung Kinunger Village Council aser Kinunger Senso Telongjem Mokokchung ajanga tenüngsang aser pelaba lemsateper.

Maneni tarutsü nung Tsüngremi nübür asoshi pa taküm temaba jenjang nung ajungketa amshiangma.

Sd/-
Imjungwati
President

Kinunger Senso Telongjem Mkg.



Sd/-
Akangtemsiu
Chairman

Kinunger Village Council.

Anogo 4 atema Aadi Karmayogi Abhiyan training tezükogo



Dimapur, Rongjui/September 1 (TYO): Aadi Karmayogi Abhiyan September 1 nü SCERT Kohima nung amenokogo aser district 12 nungi ketdangsürtem atema anogo 4 asoshi training ka tenzükogo. Iba training ya Ministry of Tribal Affairs, Government of India aser Department of Tribal Affairs, Nagaland na den longjemer agidar.

Sentong nung tongti tejaoker Advisor, Tribal Affairs & Election, H. Tovihoto Ayemi-i, Aadi Karmayogi Abhiyan ya Ministry of Tribal Affairs indang flagship national mission ka lir, koba 2025 küm tom nung July ita India Ato Kilonseri amenoktsü, ta ashi. Paisa, Aadi Karmayogi ya tekübokba jenjang nung temelenshi bener arutsü aser pei lokti nung temelenshi bener arutsür kaka akümtsü atema local lenirtem nem tashi agütsütsü atema amenokba lir ta ashi.

Paisa, Aadi Karmayoga nükjdong tongtibangtibaji India

kübok state aser union territory 30 nung district 550 aser yimtsüng lakh ka nung tribal lenirtem lakh 20 atema networking yanglua tekübokba jenjang nungi alima lenirtem anitetsü aser yimsüsüba tashi itshidaksütsü atema lir, ta ashi.

Advisor-i ashiba agi, Aadi KarmaYoga Abhiyan ya 2047 küm tashi nungbo India ya developed linük ka kümdaksütsü atema nükjdong aliba nung shilem ka lir, aser iba sentong ya lokti ajak aser talisa tribal tem aser tribal lokti tentettem nem tashi agüja parnok linük renloka aoba nung shilem agidaksütsü, tekübokba jenjang nungi lenirtem tashi itshidaksütsü aser nüburtem teyongsü sür inyakba inyakymtem yimtsüngshia kishizüng tonga bener arutsütsü asoshi lir.

Sentong nung o tatsüka jembiba mapang Secretary, Tribal Affairs Department, Angelina Tajen-i, Dharti Aaba Janjatiya Gram Utkarsh Abhiyan (DAJGUA) indang

metetdaksü. Iba ya Ato Kilonser-i October 2 nü amenoktsüba scheme ka lir, koba India nung tribal tem lenla ajak nung ternlok atema amenokba lir, ta ashi.

Lai ashiba agi, Nagaland atema department 15 longjemer inyakdar aser department ajaki iba scheme kübok pei shilem agidar.

Department balala longjemer inyakba indang jembiba mapang lai, DAJGUA ya Nagaland nung yimtsüng 608 nung benoka inyaksü aser district balala nungi training agir aoer parnok 79 yagi meyipa or parnoki angazükbatem ajak benoktsü imlaba lemsatop.

SMT team ka, super coach ana, Bharat Rural Livelihood Foundation (BRLF) nungi züngsempezü, district 12 nungi department tongtibang 6 nungi DMTs 69-i ketdangsürtem nem training agütsütsü. Training lapokba sentong ya Programme Officer & SMT, Tribal Affairs, M. Kichung Phom lenisüba nung agi.

Treasuries & Accounts Dept-i ayongzüka SNA-Sparsh training agi

Dimapur, Rongjui/September 1 (TYO): Department of Treasuries & Accounts, Government of Nagaland-i ayongzüka September 1 nü Directorate's Conference Hall, Kohima nung sorkar department tem atema SNA-Sparsh dak sendakba nung training ka ayongzüka agiogo.

Training sentong ya Director aser HoD, Treasuries and Accounts, Tssurethung Odyuo lenisüba nung agi aser shisalen sayurji Assistant Accounts Officer, PFMS, Shalinder Sachdeva aser Assistant Accounts Officer, PFMS, Meghna Sen na liasü.

Training session nung Shalinder Sachdeva-i, SNA-Sparsh amenokba indang tatsü agi metetdaksü. Iba ya 2023 küm Department of Expenditure, Ministry of Finance kübok senotsü tajungba achaayangtsü aser centrally-sponsored schemes (CSS) tem atema RBI indang State IFMS e-Kuber integrated network ka ajanga Centre aser State Consolidated Funds naprongla nungi "just-in-time" fund flow ajangzüksü nükjdong aliba tongtetsü atema benok, ta pai ashi.

Department balala nungi training nung shilem agirtem dang State nung onboarding aser post-onboarding status indang metetdaksü, kong Sachdeva-i ashiba agi, scheme ajak senteper 9 aser iba atema sen crore 65.30 aser RBI account 53 lapokogo. Paisa, 2025 küm June ita tashi nung CSS 66 iba küboki aitdaksüogo aser 2025 küm November ita tashi nungbo CSS ajak anioktsü nükjdong lir.

Sachdeva-isa, state-linked schemes (SLS) atema RBI account ka lapoktsüba, Central Ministry nungi Mother Sanction agizüksüba, e-payment files generate asütsü aser agütsütsüba amala SNA-Sparsh system kübok inyakymtem tembanga inyaksü nüngdakba lemsatopa liasü.

Pai, centre aser state napronglai SNAs aika chiokba nokdangtsü, India aser states indang Consolidated Fund tem nung balance transfer asüba, Ways & Means Advances nung state metaloker aliba tajemba kümdaksüba aser mamshi tashi SNAs tem indang bank account tem nung fund mamshi-i ayuba nungi jenbotsüba densema SNA-Sparsh indang

tajangzükttem indang jembiba. Paisa, iba system ajanga department temi fund tem koda agizüksü iba indang tangazükba agütsü aser state ya e-Kuber system den sendaktepa lir, ta shisem.

Tanabuba session nung Meghna Sen-i, pre-SNA system nungi tawa benokba SNA-Sparsh system-i ayaoka inyaksü iba indang tangazükba agütsü. Laisa, CSS atema Central Ministry-i fund agütsütsüba, SLS -DBT tasenba aser non DBT aser tanga registration aser State Scheme Manager nung New Action Menu, RBI account tasen mapping, PFMS melena IFMIS ajanga expenditure bill tem generate asüba, centre share atema GoI-i Mother Sanction chioktsüba ama indang jembiba liasü.

Laisa, system ajunga ya RBI account ka ajanga dang inyaksangshitsü, ta ashi. Tatem nung Sen-i, system ajanga mapa tetsükdaksü makai inyaksü atema portal nung feature tasentem amshitsüba indang presentation ka agüja liasü.

Training ya question-and-answer session ka agiba sülen tembanga liasü.



HOYA LAISHER TELONG-JEM
P.O-Changtongya - 798613, Mokochung : Nagaland
Motto : *Telongjem Nung Tenzükba*

TENÜNGSANG AGÜTSÜR

Dimapur Ao Baptist Arogo nung Sannüker Rev. Dr. I. wati Jamir-i sannükba mapa teinyakdak nung anibelem arema Hindustan Bible Institute & College, Chennai (Accredited to Asia Theological Association) nungi "Thesis Title:Transformation through Mission : An Analysis of Christianization and its Missiological Implications on the Worldview and Social-Cultural Identity of the Ao-Nagas" nung Doctorate in Ministry (D.Min) jenjang anguba takok tulu asoshi Akhoya Laishir Telongjemi pa nem tetushi agütsür aser Tsüngrem tenüng asanger.

Iba takok manung ajemalushir, ano Tsüngremi agütsüba shisatsü aser tanela nung tashi itshir, Tsüngrem tenzükba mapa nung tashi itta nokdaksü asoshi Tsüngremi Pa kilir nem tashi tasen agüjangma ta onoki sarasademtsür.

Sd/-
Arentemjen
President,
Akhoya Laishir Telongjem .

Sd/-
Moamongla Jamir
General Secretary.
Akhoya LaishirTelongjem

NE atema Army Recruitment Rally Guwahati nung agitsü

Kohima, Rongjui/September 1 (TYO): Army Recruiting Office, Narangi, Assam-i achaayanga Central aser Zonal Category Recruitment Rally indang Army Recruitment Rally agitsü.

HQs Recruiting Zone, Shillong kübok North Eastern State tem ajak nungi Religious Teacher JCO, Havildar Education, Soldier Technical Nursing Assistant, Sepoy Pharma & Agniveer Women Military Police atema shortlisted candidate tem Military Station Narangi, Guwahati nung September 10 nungi 13 tashi Army Recruitment Rally ka agitsü.

Shimer aliba candidate tem pei Admit Card nung shisema aliba anogotem nung anepdang

4 ako nung Panjabari Gate, Narangi Military Station tonga arutsü metetdaksüogo. Candidate temi pei Admit Card aser Rally Notification nung metetdakja aliba ama tanga original kuli kaketterem bener arutsüla, ta metetdaksüogo.

Shimer aliba candidate tem nem osang tejangja parnok indang email tem ajanga yokatokogo. Candidate tem shirnoksa Admit Card tang tashi mangu lir, mesüra Admit Card download msüteter, parnok dang Army Recruiting Office, Narangi den t o n g t e p r a t e p t s ü metetdaksüogo. Army Recruiting Office, Narangi indang helpline number ji 0361-2640134 aser ARO email ID ji (sis.putana@nic.in) asütsü.

DPC election agitsü sangdonger

Dimapur, Rongjui/September 1 (TYO): Dimapur Press Club (DPC)-i, taruba term atema executive body tasen shimtsü asoshi election agitsüba sangdongogo.

Tang ketdangpurtem tenure ya 2024 küm July ita officially tembang, saka 2024 küm December 16 nü DPC Silver Jubilee amungtsü aliba atema parnok mapang atsülangja liasü.

September 1 nü Conference Hall, E-Space, Dimapur nung inti senden amenba mapang club züngsemtemi election agitsü atema bangjemogo. Election inyakym ajak achaayangtsü atema züngsem ana agi kümtetba Election Commission ka shimogo.

Election atema item mapanglem lateta yuogo:

* Nomination file asütsü atema September 2 nungi lapoktsütsü

* Nomination file asütsü atema tatembangbuba anogoji September 9 asütsü.

* Election ya September 10 nü Conference Hall, E-Space, Dimapur nung 1 ako nungi tenzükba agitsü.

Election ya President; Vice President; General Secretary; Joint Secretary (mapa ana); Information and Publicity Secretary; Finance Secretary; aser Treasurer ta mapa ti atema agitsü.

Election atema temsü alirtem:

1. Pa/La sorkar mesüra political party kecha nunga mapa bena malitsüla
2. Pa/La local osang kakat mashi ka nung küm asembo inyaker alitsüla
3. Pa/La DPC züngsem küm asembosa asütsüla

Mapa balala atema tokteptsü janngaratemi nomination file süa dimapurpressclub@gmail.com dangi yoktetsü mesüra ketdangpur mashi ka den tongteprateptetsü.

Temsüa aliba candidate ajak dang election inyakym nung yakyaka shilem agitsü mepeshia metetdaksüogo.



CHATTERJEE NOBLE SCHOOL

AFFILIATED TO CBSE- DELHI (2430356)
BIRNAGAR, NADIA, WEST BENGAL
(NEAR KOLKATA)



HIRING TEACHERS & STAFF

Post Vacant :

4 Assistant Teachers Sub : English
(Must be Fluent In English)

2 Security Guard for 24/7 (Should be Familiar)

2 Cook - Male & Female both can apply
(Should be Familiar)

Education Qualification
for Teachers - Graduate/B. Ed
For Others - Class XII

Teachers Salary - 15k to 20k
(With Accommodation)

For Others - 10k to 15k
(With Accommodation)

Tir Yimiyim office, SB. 24
Naga Shopping Arcade
(Super market), Dimapur
Nagaland

Contact No- 9836831662
cnsbprincipal@gmail.com
www.chatterjeenobleschool.com



Kabul, September 01, 2025: Kabul nung aliba Indian Mission nungi Kunar-i teyari oset balala bener otsütsü lia tangokba noksa nung angur. Indian EAM Jaishankar-i, September 2 nua India-i menoknok lendong agi kongshiba linük, Afghanistan dangi teyari oset aika yoktsü ta metetdaksü.

Tianjin nung Modi-i Russia Tir Putin aser China Tir, Xi na ajuru

Tianjin, September 01 küm October ita nung Russia (Agencies): China kübok kükob Kazan yimti nung Tianjin nung SCO senden jakdang Ato kilonser Narendra Modi-i Russia Tir Vladimir Putin aser China Tir Xi Jinping na ajurua par asem mapang tatsüka sensaksema liasü.

Tir Putin aser Ato kilonser Modi na azütep, iba sülen sabangleni oa SCO züngsem linüktem nungi tekolakpurtem den lokti noksa tangoka liasü.

SCO senden tembangba sülen Modi aser Putin na jurila senden ka amentsü sentong lir.

Amongnü Indian Foreign Secretary, Vikram Misri-i X ajanga, "Ato kilonseri SCO summit nung jembitsü. SCO kübok züngsem linüktemi amalitepa inyaksü atema pai India tangatetba lemsateptsü. Iba sülen pai Russia Tir Vladimir Putin den senden amentsü. Tesüsa pa India-i meyipa arutsü," ta metetdakja liasü.

SCO senden aliba mapang Modi-i China Tir, Xi Jinping den-a jurila senden ka menogo. 2024

küm October ita nung Russia

BRICS senden aliba mapang

tena jurila senden ka amenba

sülen linük ana tsüngda

tesendaktep junga akümba

tenati asadangogo.

Modi aser Xi napronglai,

India aser China na ya

tsükchirtem masü saka terenlok

tsütsü partners lir, anungji

tangatetba balala ajanga

mangatetep ken o

mekümdaktsütsüla, ta tenati

bangjemogo.

Tenatisa linük anaprongla

ajangzüktsüsa amalitepa

inyaksü, akhümtsübutepsü

aser külemi renloksü atema

inyaksü bangjemogo.

Modi-i Xi dang, linük ana

tesendaktep maneni tajungba

akümtsü atema arrtsülen

yimjung aser tesünep alitsüji

kanga tongtibang, ta ashi.

SCO nung züngsem linük

terji India, Belarus, China, Iran,

Kazakhstan, Kyrgyzstan,

Pakistan, Russia, Tajikistan aser

Uzbekistan linüktem lir.

North India nung Army temi nisung 5,000 dak tali kümzükogo

New Delhi, Rongjui/ September 01 (Agencies):

North India nung tzümetsüng agi kongshiba state tem nung Indian Army Western Command-i Humanitarian Assistance & Disaster Relief (HADR) kübok kümzükba aser teyari agütsüba maparen inyakdar.

Indian Air Force sepaitemi Army aviation helicopter aika amshia tzümetsüng agi kongshiba tesemtem nung nisung 5000 dak tali kümzükogo aser engineers, medical aser communication resources amshia teyari agütsüba maparen inyakdar.

Major General Puneet Ahuja aser Colonel Iqbal Singh Arora nati Chandimandir, Panchkula nung aliba Western Command headquarters nung osangabenertem senden ka

ayongzüka osang tejangja metetdaksüogo.

Col Arora-i, "Kümzükba maparen inyaksü aser teraksatsüba tanaben asentenshir yangershitsü atema mapang tatsüka tsüngda sepaitem, engineers, medical workers ayongdena aviation osettem amshia maparen tenzük," ta metetdaksü.

Tongti office shia nung flood control monitoring cell amenokogo aser Bhakra Nangal Dam, Ranjit Sagar Dam densema tongtibang tesem aika nung tzü level maneni mita repranger. Iba dak alia NDRF, SDRF aser sorkar ketdangsertemi item maparen nung yaritepa arudar.

Arora-i, Chinook ka aser Mi-17 ka densema helicopter 20 amshia khen-a methitemi kümzükba maparen inyakdar, ta

metetdaksü.

"Tzümetsüng aliba tesemtem nungi nisung 5,000 den paramilitary sepai 3000 dak tali kümzükogo," ta paisa metetdaksü.

Tayimtsü ajanga anünglen nungi chiyungtsü, mozü aser nüngdakba oset balala touzük seret 21,000 tsükdaktsüogo, ta paisa metetdaksü.

Himachal Pradesh aser Jammu & Kashmir na nung Sutlej, Beas aser Ravi ayongtem nung tzü kanga mobanga yimdar, aser ibaji ajanga Punjab tesem aika nung tzümetsünga lir, ta paisa metetdaksü.

Punjab kübok tzümetsüng agi talisa Gurdaspur, Pathankot, Fazilka, Kapurthala, Tarn Taran, Ferozepur, Hoshiarpur aser Amritsar district tem tamajungba kongshiogo.



September 01, 2025 nü Kolkata nung Left-wing party tem nungi züngsemtemi Palestine nunger pusema longkak aita jajaba noksa nung angur.

Electoral roll ya NDA-i melungba ama renemer: Hemant Soren

Patna, September 01 (Agencies): Hombarnü Jharkhand Chief Minister, Hemant Soren-i, special intensive revision (SIR) tenüng atemer BJP-i aniba NDA-i nüburtem temeden rakzüker, ta aitsü.

Paisa, electoral roll ya NDA teloktepi melungba ama renemer, ta ashi.

Hombarnü Patna nung Congress-i ayongzükba 'Voter Adhikar Yatra' tatembangbuba sentong nung jembidang Jharkhand Mukti Morcha (JMM) lenir Soren-i, NDA sorkari lemsar yimsüsüba mapatong benoker, ta shia opposition INDIA teloktep dang NDA sorkar laodaktsütsü atema maneni longjema alitsü ayongzük.

"Asen vote ajanga linük temzüng kümzüker. Nü vote ji party ka meyong masü; ibaji linük atema lir. Vote agütsütsü temeden kümzüktsü atema nüburtemi raratsüla," ta pai ashi.

"SIR tenüng amer BJP-i aniba NDA-i nüburtem temeden rakzüker. Tang

mezüng iba mapatong benokba ya nüburtem temeden rakzüksü atema lir. Yimsüsüba teloktepi melungba ama electoral roll renemer," ta pai metetdaksü.

"Tesüiba küm aika BJP-i aniba NDA sorkari 'vote auyaba' nung shilem agir, aser state sorkartem chirepdaktsütsü atema MLA tem alizüktsü meranger. Iba sorkar ya agientsü atema mapang tongogo," ta Jharkhand Chief Minister-isa metetdaksü.

SIR anema raraba ya Bihar atema dang masü saka linük kümzüktsü atema lir, ta pai ashi.

"Opposition anema BJP-i Enforcement Directorate (ED) aser CBI densema central agency tem amshir," ta paisa aitsü.

"Lok Sabha election mapang nung parnoki ni jail nung puok. Assembly election mapang nung ni jail nungi chiok aser Jharkhand nung onoki takok tulu ngua sorkar aküm. Lok Sabha election mapang nung ni chiok asübo ozü state nungbo parnoki (BJP) menden kata mengula," ta pai ashi.



TIR YIMYIM YIMOBILEM (EDITORIAL)

DIMAPUR TUESDAY, SEPTEMBER (RONGJUI) 02, 2025

Kidanger jungtepbasa tajungba

Asenok kong lidir liaka asen kiyong nung aliba kiyonger ajak den jungteptsüla saka ano kiyonger dang nungi asen ki den külena-külena medemtepa aliba ki aser kibong nung alir kidangertem densa teputepba aser tejungtepba asütsübaji kanga tongtibang aser tenügdaktsü, kechiyong asen lendong agi menepdanga tamasa kidangertemi metettsü, ajisür külen kiyonger aser külenang kinunger aser yimtsür yimer, medemer ta metetyonga aotsü. Aji oda, ajungben lendong nungbo kiyonger, kinunger aser yimtsür yimertem arua atongdangbo tataloktsü tashibo ataloker asütsü. Kasaji, kija kibong dang masü saka alima nung kintema tangar bendanger kintem dang nungibo kidanger kintem denang akok tashi jungtepa alitsübajiang tongtibangba lir, kechiyong alimabo balala asütsüa akok saka tzü aser mopongbo külemi dang agir aser nüngdak mapang yariteptsübajia tangar talang nung aliba kintem dang nungibo ana nung aliba kidanger kintemang tajungba aser tenügdakba akümer. Ibaji meteta alima kintem rongnung, talisa, India ama linük nung yimsüsürtemi oagi talang nung aliba US, UK aser Russia ama den jungteptsü agibo pei kidanger Pakistan, China, Myanmar aser Bangladesh ama kintem den jungtepbasa tajangzük aser teyari tuluba angutsü. Aji oda, tawa tanü US tir Donald Trump-i India den shishilembaba maparen nung tesendaktep raksatsüsa inyakba den külemi ano Russia aser Ukraine na raraba ya India-i Russia yariba ajanga maneni raradaktsür ta tai tonglokja jembibaji India asoshi taoksatsü osang dang masü saka mezügmeshiba o ka asütsü. Atangji, yangji India asoshi tangazüktsü lesson tuluka lir. Donald Trump kolok ya, tamalen iba yimobilem nung lemsatepba ama, atamata kolok masü. Pai Russia mulung akoktsü mechi Ukraine tir Zelenskyy par kidangi jaoker yimjak nung alima tsüngdang merenshia sayu aser yamaji Russia peladakja alidang Israel pusema Russia tembar Iran amak. Ajisüaka, tangbo jet ta meyiper Russia aser India na toktsür China denang jungteptsü merangba angur. Zelenskyy den jembi dangbo Russia pusema sayu saka tangbo India-i Russia dang nungi totzü aliba dena Donald Trump –i aitsür aser India-i Russia dang totzü aliba sen agi Ukraine anema raradaktsür, iba jagi rara manener ta India jakdaka aitsüba o ji, atangji, kin kati kin ka mezügmeshiba o ka asütsü. Aji oda, US-i India dang shiba dang kechibo alitsüla aser kechibo malitsüla ta ashitsüsa tensa tia ka nung India lira, yashibo British nunger kübok liasü saka tanübo US kübok alir asütsü. Item ajakji US teyari agi kidanger anema inyaktsü tangatetba nung India mapang talangka mulung lema lia aruba ajanga ataloker. Aji oda, Pakistan den rara nunga US teyari meshitsüsa akümer aser China den rara nunga US teyari agia raratsü amai US-i bilemdakja aruba agi, India asoshi kidangerbo ajak tsükchir aser talang nung alir bendanger kintemang tembar kümer lia arur. Ibayongji, tawa India aser Pakistan na rara dena US-iang anendaktsü ta Donald Trump-i taolen ajak nung jembia jajar. Tetezüji, Pakistan o India na prongla US ket nung lir aser tena raratsü aser meraratsübajia US dak keta lir. Joko, tang atalokba yagi tan ser India-i China ya tsükchir kin amai mebilemtsüla aser ali tsütsü kechi nungsa telemtetba kati maruteti lir, item ken o ji tatem küma jembir teti asoshi India o China na yimjung nung alitsüsa telemtetba tajung kar alitsü nüngdaker. Aji oda, alima kintem rongnung teti agia US, UK aser Israel külemi asütsü. Iba amaji India, China aser Russia kintem ya külemi asütsüla aser Pakistan dena Kashmir ken o ya tatem küma jembir yimjung nung kinunger kümer alitsüla . Atangji, iba jagi India-bo US,UK aser Israel ama kintem den mejungteptsü ta masü saka parnok denjia akok tashi maparen ajak nung jungtepa alitsüla, kechiyong India dak yimten tangatetba ka lir aser aji labo alima kin tulu shinga dena balaka tesendaktep tali mayutsü asoshi 'Non-Aligned Movement (NAM)' telungjem nung dena lir.

OLEMSABANG

OCHISHIA MERANGA INYAKA ALIBASA AJAK DANG TAJUNGTIBA

~ L. Kika Pongener.

Tanü asenok aliba putu ya, libalirotsü kanga tasak, talisa, sensaker alitsü kanga tasak lima ka kümogo. Aji oda, sensakerbo lokti nunga mezüngokba lima ka kümogo. Anungji nisung aikati, taküm jangradema linudang, lokti nung jenjang tajung (Status/Position) aginudang aser tangar den atongsema aser atongoka linudang, ochimashi mapa inyaka rongsen bendentsü meranger. Atangji, tanü putu den jangyu-medema linudang, metetsümonga aibelena ochimashi inyaka rongsen bendentsü meranger. Tanü putu nung asen lima nung sobaliba tentet tamajung kaji....Loktiliba balala nung lennir shimdanga aser sentong tongtipang kar nung tongtipang shilem kar agidaktsütsü shimdanga, takar-tulur repranga, mesura tenla tulu angutsü teimla nung tuluba rangloker shimer. Yongji, nubur ajungai tashi ajak agi toktepa rongsen bendena takar akümtsü merangteper. Tsüngrem o-i ashir..."Takar akümtsü temerang; Aji nokdangtsüsa na shisa ka-ang. Nai idakji tenuk yokdang, aji oa-adoker. Kechiyong aoksaa rongsen dak tashikang tener Orija ama anungleni yima oa-adoker" (A.Shin-23:4). Aji oda, Tsüngrem o-i ashibaji....Tim masüba lenmang aser ochimashi lenmang nungi bendena takar akümtsü temerang ta ashirba...ta angateter. Aji oda, tim masüba lenmang nungi bener aruba rongsenji Orija ozü ama tashikang tener yima oa-adoktsü. Tetezü....Aika bendenyongjia ashiko asenok magishitsü....Angadi anguba rongsenji angadi nung dang endoktsü.

Asen mimchirtemi asen ket nung rongsen aika alinungdang, taküm ya jangradema alitsü amai bilemer, saka rongsen aika bendena yur, maneptetba tashidak kar agi meneper, ayako dena timtema lira, aji kechi jangrademtsü taküm asütsü (?) Asen ket nung rongsen aika meliaka, asen temang anema lia, kechi chinur, kechi jemnur ajak chiteta/jemteta lira, aji-ang rongsen tulutiba asütsü. Shin o nung ashiba ama..."Anema alibaji rongsen"...Ibaji-ang jangrademtsü masü no ??? Asen temang shi nung timtem tulu keter rongsen aika akaba dang nungibo, anema junga lia tanü poksung alibasa ajak dang tajungtiba. Tsüngrem o-i ashir..."Timtem keter rongsen tulu akaba dang nungi; Kibuba tsübuba den tera akaba tajungba" (A.Shin-15:16). "Ki ka nung rarabangsen agi sunga benjong aliba dang nungi chiyungtsü takong ka den tesungjem tajungba" (A.Shin-17:1). Tsüngrem tsübua ochishia inyaka, tim lenmang nungi bendena tera akabasa ajak dang tajungtiba. Ashikülaka, külak-kübonga, tangar nuksu yima jashidakja rakzükrakdema bener aruba rongsen/chiyungtsüji aikati kanga nang-nanga bilemer, saka ibajagi asen taküm/kibong asoshi tesulen kechi ataloktsü ajibo meshisadanger. Tsüngrem o-i ashir..."Külak-kübong agi bena aruba chiyungtsü nisung tsüngdang tanang; Saka tesulen pa tebang lungsang agi asüngtsü" (A. Shin-20:17).

Tanü putu nung nisung karbo, manger-mesangwa tsüngda (Over-night) nung takar akümba-a lir. Pa/la itasen anguba nungia masü, alu meranga züsena ayimba nungia masü, shishilempaba mapa kar meranga inyaker tajangzük anguba nungia masü, saka kong nungi angur'ar odi-odia meshitetba lenmang kar nungi, oda "Snake Game" nung khenyongi 1-100 tashi atuba amai, khen nung dang takar akümba karbo lir. Ashiko, shibai metet...aji tim lenmang nungi anguba, mesura ochishia inyaker bener aruba rongsenbo masütsü sudi...!!! Tsüngrem o-i ashir... "Ajongben anguba rongsenji ajema akümtsü; saka züsenba agi terara shibai bendendir pa züintsü" (A.Shin-13:11). Atangji, ajongbena rongsen aika mashileni bendener, manger-mesangwa nung takar akümba rongsenji koloni aotsü (?) Kechi komala lenmang ka nungang endoktsü'ar memetet....!!!. Ajisuaka, asentsü sena meranga inyaka terara bendenra....Ashiko, ajibo nang-nanga tachi-shizüka achitsü aser amajok nungbo meintoktsü sudi. Angadi mela-mela bendenba rongsenji memetetba lenmang kar nung angadi mela-mela dang endoktsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yisui nükpoker ka aneptsüba tesem nung jara ka ngutetogo



Yirusalem nung Siloam tzübo noksa nung angur

September 01, 2025: Akhidang Yirusalem yimti nung aliba jara ka archaeologist temi ngutetogo, aser iba jaraji Yisu Khristai nükpoker ka aneptsüba Siloam tzübo anasa ngutet.

Research agirtemi ashiba agi, osangtajung Yohan kaket nung Yisu Khristai nükpoker ka aneptsüba indang shia aliba tzübo anasa jaraji ngutet.

Siloam tzübo anasa ngutetba jaraji metonglen süklep 39 lir aser iba ya küm 2,800 tejaklen yangluba lir. Iba jara ya Gihon ayong nungi Silom tzüboi tzi mesür aoba 'hydraulic system' indang shilem ka liasü.

Iba tesem nung ali tua bushisüngdanger archaeologist temi mortar nung aliba organic material ji koba mapang nung liasüar asadangteta liasü.

Israel Antiquities Authority nung Excavation Director,

Itamar Berko-i, tang ngutetba jaraji tzi tepdangba jara lir, aser iba jara ya Joash aser Amaziah Chubatem yimsüsüba mapang nung yangluba jara lir, ta metetdaksü.

Berko-isa, tzi-tepdangba dam ji lenden nung süklep 26 aser süklep 68 talang lir, ta ashi. Iba jaraji Tasen Lai nung shia aliba Siloam tzübo anasa lir. Iba tzübo nungji Yisu Khristai nükpoker ka tenük nung lishi nüloktsüba sülen aneptsü atema shidoktsü tuyua liasü.

Heritage Minister Rabbi Amichai Eliyahu-ia, "Yirusalem yimti tiyong nung ngutetba dam ya Israel nung dam tulutiba lir, aser ya ajanga Judah yimli aser Chubatemi alima tzi-mopung lendong azioktsü atema junga asameyanga inyakba kuli angur. Küm 2,800 tejaklen akhidang Yirusalem nung alirtem dak

engineering sempet liasü aser tziümetzüng ama lendong balala nokdangtsü atema tasa junga amshiba kuli angur," ta metetdaksü.

Tawa ngutetbatem ya taruba ita tetenzüklen 26buba City of David Studies Conference nung "The Lost Pool - The Enigma of Siloam" ta ser metetdaksütsü.

2022 küm December ita nung Jerusalem Mayor, Moshe Lion-i sangdong ka ajanga, "Yirusalem nung aliba City of David National Park nung Silom tzübo tesem ya puti otsü, linük aser international atema tongtimbang tesem ka lir. Küm aika jembia aruba sülen kobi melii onoki iba tesem jungunga bushisüngdangtsü aser küm shia Yirusalem semdangertem aser raliwalirtem dang iba tesem sayutsü," ta metetdakja liasü.

Turkeynung Khristantem anema inyakba kanga bulua ataloker

September 01, 2025: Turkey linük nung Khristantem anema inyakba kanga bulua ataloker, ta Association of Protestant Churches indang building kima telok kati longkak aita liasü.

Muslim nungertemi longkak aita, "Onok Muslim nunger lanurtem tangatetba melenshidaktsütsü atema onoki nenok nem temelaba magütsütsü. Nenok mamangertem, onoki nenok amaktsü aser molumi tashi aridoktsü," ta ayimdena liasü.

Linük nungsa Tenla ki aika nung injang khaloktsü, Tenla ki bendoktsü aser amokmeren.

Ano school ka nungbo kuli kecha makai Khristan tetsür ka tesayur mapa nungi

December 31, 2024 nüa Turkey yimtiba, Istanbul nung aliba Salvation Church Association indang building kima telok kati longkak aita liasü.

Muslim nungertemi longkak aita, "Onok Muslim nunger lanurtem tangatetba melenshidaktsütsü atema onoki nenok nem temelaba magütsütsü. Nenok mamangertem, onoki nenok amaktsü aser molumi tashi aridoktsü," ta ayimdena liasü.

Linük nungsa Tenla ki aika nung injang khaloktsü, Tenla ki bendoktsü aser amokmeren.

Ano school ka nungbo kuli kecha makai Khristan tetsür ka tesayur mapa nungi

anendaktsü. La dang, "Na kechi associations nungsa adaner aser shirnok den tembar ayimerar kanga kümdangtsüla," ta amokmerena liasü.

Turkey nung bendanger Khristantema amokmerener, linük telungi maitdaktsür aser visa magütsür. Turkey nung Protestant Arogo 200 shii dang lir aser tekülem sentong agitsü atema item Arogotem nem 'rent' magütsür aser official temelaba magütsür.

Sorkar ketdangsertemi Khristan shisaliok memelar, ibayongji Arogotemi seminars dang ayongzüka agir aser bendanglen dang training agitsüsa akümer.

Bhutan aser Myanmar na nung Khristantem anema inyaker

September 01, 2025: Buddhist nütsüng teimba aliba linük ana- Bhutan aser Myanmar na nung Khristantem anema inyakba manener, ta International Christian Concern (ICC)-i metetdaksü.

Buddhist yimsü alia amangertemi Khristantem dak azüker, tenokdangba balala benoker aser Khristan yimsü tokjang ta rongshir, ta ICC-i metetdaksü.

Bhutan nung Khristantem tasü mang aremtsü memelar

aser yimjak nung tekülem agitsü memelar, iba dak alia Arogotem dang Commission for Religious Organizations (CRO) nung register asütsü tuyur.

Myanmar (Burma taka ajar) nung Burmese nunger ka asütsü atema Buddhist yimsü amanger ka asütsüla, ta akhidang nungi Buddhist nationalist temi jembia arur. Taküm February ita nung United States Commission on International Religious Freedom (USCIRF)-i senden

ka ayongzüka Myanmar nung tamangba yimsü temeden jenjang tamajungba dang akümba metetdakja USCIRF Chair, Meir Soloveichik-i, "Tesüiba küm pezü tsüngda Burma nung meimchir temeden jenjang kanga mejungi kümogo. Tesüiba küm 20 dak tali Burmese sepaitemi lisopurtem aser minorities anema inyaker. Buddhist sepaitemi Khristan aika tepsetogo aser aija jenshiogo," ta metetdakja liasü.

ANO GO ABEN TSÜNGREM DEN

Temoatsütem - Khrista tekolak

"Saka temeim nung ochi jembia ajak nung Pa dak asenok aintsü, Paji tekolak, oda Khrista, aser Pa dak nungi temang... temangji peisasa temeim nung ina tain kümdaktsür" Efesa 4: 15.16.


Meimchir temang nung asameyang aser tebilemba ajak tekolak nungi agütsür. Kongshiba metetba , menemtetba, angashiba, menakdangba item ajak jagi temang junga aliba nung yarir. Parnoki kümdangdaktsür, aser ajung majung tendanger.

Khristaji Pa temang arogo nung tekolak lir. Tekolak ajanga temang anema alitsü ajak agütsür. Tekolaki meyarira, tenarongi temang nem osangtsüsang chiyungtsü agütsütsü makok. Tekolak medeni temang tenük telen kechai-a mapa kecha meinyaktet.

Temang nung tenüklen ajaki pei mapa shitak inyakba ajanga asenok temang indaktsür. Tepokboki temang shilem ajak nung mopung agütsür. Temulungjangi temang shilem ajak nem azü agütsür. Tezüi (nerves) tashi metetdaksür. Saka katia tekolak den mesendaktepi pei mapa inyaktsü makok.

Tsüngremi meimchir temang aser Khrista temang anapronglaji yanglu. Tenük telen shiai temang asoshi inyakba ama, tamanger shia Khrista temang arogo asoshi inyaktsüla aser alitsüla.

Tennessee nung pastor ka gari lendong nung asü



Rev. Rowland Seth Buck

September 01, 2025: Tan toktsür pilaogo. hopta Tennessee nung aliba Buck'er medemer aser Arogo ka nung pastor ka cycle pastor, Jason Rowe-i, "Buck nung toudak mapang nung asüba osang angashia jashir. semi-truck kati tsüksetogo. Buck-i ozü jabaso tambusang baptija liasü. Mapang ka nungbo küna külemi akhidang azüngba seminary-i oa liasü," ta metetdaksü.

Arrshi küm 61, Rowland Seth Buck, Tennessee kübok Alcoa nung anepdang cycle ka nung toudak mapang nung East Hunt Road nung truck kati atsükba sülen pa yirua University of Tennessee Medical Center-i anir ao, saka meküzmükteti asü.

Iba lendong atalokba sülen Alcoa Fire Department aser American Medical Response nungi ketdangsertem iba tesem jagi oa liasü.

Rev. Buck ya Louisville nung aliba St. Mark's Global Methodist Church nung küm aika pastor inyaka aruogo. Pa Global Methodist Church nunga Tir liasü.

Pai kinüngtsü, Sinda den jabaso ana- Caleb aser Chris na aser semchirtem Sauphia, Sutton aser Holland nunger

Rowe-i, "Buck ya medemer tajung ka, kibong züngsem ka aser Arogo ajanga lokti nung temelenshi bener arutsür ka ama bilemtettsü," ta metetdaksü. Paisa, "Atangji pa ya teburchi liasü. Pa ya tamangtir ka aser Yisu kanga meimer ka liasü. Pai yamaji jaja, yamaji taküm ali aser pai nisung ajak nem Khrista dak anguba tesünep ajangshidaktsünüa liasü," ta metetdaksü.

September 2 nü nikongdang 5:00 ako nungi Fairview Church nung züngsemtemi pa nem akhüm agütsütsü aser aonung 7:00 ako nungi Rev. Brian Rainwater leniba nung asüpila sentong agitsü.

AO OSHI ANGAZÜKDAK:**TANÜ ANGAZÜKTSÜBA OJANG****Tetenzükren**

(adj) mezünglen nungi taren sena aruba (lineage)

* Asenok ajaki pei kidong tetenzükren metettsüla.

Tetezü

(adj) tangatettsü, tatishitsü, tamaitsü (meaning)

* Samaro teloki tetezü tajung aketba ken aika aten.



Tir Yimyim

OLONG PAITEP # 7258

1			2			3			4	
			5		6		7			
8										
			9							
	10									
								11		12
			13				14			
15						16				

TIPLÉN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ___ adenshi - (4)
14. Tsünösenbongtsü adokdak - (3)

OLONG PAITEP # 7257 TELANGZÜBA**TIPLÉN :**

1. Kasa, 6. Rangben, 7. Mait,
9. Poktet, 11. Ati, 13. Atasa,
16. Rür, 17. Rajang, 20. Lanu,
24. Nüngjem, 25. Süra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Tajü, 21. Ano,
22. Onü, 23. Kua.

**NISUNG DAK ATALOKBA ASER YIMYATEM****Alokba :** Ni tagitsü o kar shidi arung,

1. Ball asayadang par Telok nema ball magütsünüba tokoro nisunga lir,
2. Tayimsü nung amentsübo pongmang sür tayimtsü anishinüba shisatsü,
3. Taoyadak nunga sarasademba yimya,
4. Lontemi chitem den toktepba shisatsü,
5. Kinungtsü shirang nung kinungbo ang ku tsütoker,
6. Tetsüi mersü achi nung kinü tanuriang mersüjang kozüba,
7. Par kinunger külemi ang apudang raktepa apuba nisung,
8. Techanubo padak chanu tetsütibo an,
9. Mapang indoka laishibaji mezüngli, süra mapangji tongtipang asü laishibaji tongtipang?
10. Itsük ayoker jagisa isüjia yokya alitsü,
11. An intsüi kodanga makonger,
12. Kumpok süng agi Shitiküp asotsüna?
13. Mejanger mesaksü tsüburtemi kodanga memejangnür,
14. Teti menürema linüyonga tepangmechijibo merangdoktsüla,
15. Akshi tsübuba agi chi i poknüngleni ajener in,
16. Tetsüri tebur yanglur tebur shilem agiba putu,
17. Tsüngrem tenzüksü maongka angu nung interview nung atok ama bilemer,
18. Mobile phone i mang nükdaksüba putu,
19. Kodanga kinungtsü nem itasen mamoktsüba kinungboa lir,
20. Talongtsü nung memendangertema talongtsü lendong nung asür,
21. Kii modangba amitsüra lir,
22. Tasodangbo tebur aso, tasüdangbo woman police ka asü,

Telok: O Alokba!!!

~Lilir: I. Kilang Ajem, Indisen, Dimapur.

Bangladesh nunger shibelener aruba nung Hindu nunger lanurtem densema lir: Assam CM**Guwahati, Rongjui/September 1 (Agencies):**

Assam Chief Minister Himanta Biswa Sarma-i ashiba agi, Bangladesh nunger shibelener aruba tezü adongsatsütsü atema ketdangsürtemi jenjang agidar. Bushisüngdangba mapang local Hindu nunger lanurtem iba inyakyim nung densema aliba ngutetogo.

Deobarnü Silchar nung osangbenertem den sensaksemba mapang Chief Minister-i ashiba agi, syndicate kati nüburtem ozüing alema arrtsü adena arutsü asoshi teyari agütsüdar aser nisung shia dang sen 20,000 meshir.

Media sangdong balala ajanga ashiba agi, Bangladesh nungi ozüing alema nüburtem aruba tebilemtsü nung shibelenba inyakyim ya shilem ka lir. Küm

**Himanta Biswa Sarma**

aika kuli kaket tejangja maliba migrant tem senoka aitba ajanga iba tesem tetsüdahtsü aika ajangshia arudar. Bangladesh nung sensaktia nung aliba aser India nung arua maongka tajungba angutsü timla nung item nisungtem senoka aiter.

Iba ajanga state nung lokti liba, rongsenketzüing aser yimden yimsüsüba nung mepetmesü adokogo. State sorkari iba

inyakyim nung densema alirtem anema jenjang taliba agi tenzükogo.

Ketdangsürtemi ashiba agi, ozüing alema arurtem ya Tripura, Dawki, Mankachar aser Sribhumi len nungi arur. Local media sangdong balala ajanga ashiba agi, police temi nisung aika puogo aser bushisüngdanga aoba mapang ano jenjang tali agitsü imlar.

Nisung shibelener aruba den ano nashi jang, temesepba mozü, sen taila shibelener arutsü atema Indo-Bangladesh arrtsü ya lenmang ka ama amshir.

Iba den ya raratsü atema Border Security Force (BSF) aser security agency temi drone amala modern technology tem amshia tali meita atadar aser arrtsü nung atsü atsütsü atema inyakdar.

Assam nung Bangladesh jihadi telok den sendaktepa aliba tesayur 2 apu**Guwahati, Rongjui/September 1 (Agencies):**

Assam Police-i, Jamaat-e-Islami (JeI) densema Bangladesh nung amendaker aliba jihadi teloktem den sendaktepa alitsü ta temulung melemi bilemba school tesayur ana Dhubri district nungi puogo.

Tesayur ana apuba ajanga lower Assam kübok arrtsü nung aliba tesemtem nung lokti rijutem extremist agi kongshir asütsü ta tsübua bilemer.

Police-i August 27 nü international arrtsü anasa Lakhimari Middle School nung tesayur Shah Alam Sarkar apu.

Bushisüngdangertemi ashiba agi, Sarkar ya züngsemtem anisemba, propaganda prokshiba aser arrtsü adener kiralongrartem nem logistic teyari agütsüba nung densema liasü.

Ketdangsürtemi Sarkar

tesayur inyaka aliba Lakhimari Middle School ya taoba mapang madrasa, Lakhimari Pre-ME Madrasa liasü, saka 2023 küm December ita SEBA-affiliated school ka kümtsüogo, ta ashi.

Sarkar apuba sülen ano kasa school nungi Hazrat Ali samatok aser pa ya state ajunga nung bushia liasü. Police temi pai sleeper cell network operation indang tongtibang osang bona alitsü ta tsübua bilemer.

Itangitertemi osang agütsüba dak ajemdaker Golakganj Police Station Officer-in-Charge Debajit Kalita-i anir police team kati Ali ya Honibar aonung Kokrajhar district kübok Kazigaon tesem nung apu.

Tenaprongla dang tang ken o ashishidar. Tena ya Bangladesh nung amendaker aliba extremist teloktem den sendaktepa ali mali aser Assam

nung sleeper cells amenokba nung tenati shilem agi magi iba indang bushisüngdangdar.

Dhubri nung tensa mejungi aliba mapang tang tesayur ana apuba ajanga tali süoki ia bilemtep tenzükogo. Iba ita tetenzüklen Lakhimari aser Bishkhowa yimtsüng nung alirtemi Bangladesh indang number ka nungi amokmerenba osang angazüka liasü.

Phone nung jembir yagi Indian security agency tem den sendaktepa inyakra kanga mejungi merenshitsü amokmerena liasü. August 14 nü police-i Bangladeshi SIM card aser national wako ka bener senzüa aliba atema lanur ka apu aser iba ajanga iba tesem mesüngjemteti kümdaktsütsü atema jenjang agiba tali temulung melemi kümdaktsü tenzüka liasü.

Manipur nung sen crore 12 alang temesepba mozü bener nisung 4 apu**Imphal, Rongjui/September 1 (Agencies):**

Manipur nung security force temi taoba ghonda 24 tsüingda temesepba mozü shibelener pezü den sen crore 12 alang temesepba mozü puogo, ta ketdangsürtemi Hombarnü metetdaksü.

Tengnoupal Police Station kübok Tengnoupal Naka check-post nung sepaitemi Moreh Premnagar Ward No. 4 nung

alir Jahiya Khan (25) aser Md Zamir Khan (23) na apu.

Team-i tena ket nungi "World is Yours" (WY) methamphetamine tablets seret 3.387 den gari ka pua liasü.

Tanga meita aoba sentong ka nung Churachandpur district kübok Singhat Police Station temeket nung ano nisung ana puogo.

Aija alisang ana ya Lhanghoi

Veng nungi Paokholal (53) aser Joljam yimtsüng nungi Lalpu (43) ta jangjaogo. Tena ket nungi tesem balala nung brown sugar (heroin derivative) soap case 24 nguteta liasü.

temzüng ozüing dak ajemdaker aija alirtem anema ken o benokogo aser temesepba mozü shibelener aruba tera jangjatsü atema ken o maneni bushisüngdang südar.

Afghanistan nung menoknok lendong nung nisung 812 süogo



September 01, 2025 nü Afghanistan yimtiba, Kabul nung sepaitemi maneni kümzükba maparen inyakba noksa nung angur. Amongnü aonung Afghanistan kübok Kunar province nung menoknok lendong tulu ataloka nisung 800 dak tali süogo aser nisung 2,817 dak tali yiruogo.

Kabul, Rongjui/September 01 (Agencies):

Amongnü aonung Afghanistan nung menoknok lendong tulu ataloka nisung 800 dak tali süogo aser nisung 2,500 dak tali yiruogo; asürtemji iba dang nungjagi teimba akümtsüa akok, ta ketdangsertemi metetdaksü.

Magnitude 6.0 nung anokba menoknok tiyongtsüji Jalalabad anasa liasü. Iba menoknok ajanga Nangarhar aser Kunar province na kübok yimtsüng aika kanga mejungi kongshia kiojen aika raksatsüogo.

Talisa Kunar province kübok Nurgal district nungbo yimtsüng tiembaka nung kiojen ajak amai chirep. Iba lendong atalokba sülen ki chirepba jana nungi tanur-tain tasümgang aika agitet aser nisung aika jeptepa teka tesa agi jana indoka pei kinüngertem bushitep.

Mezüng menoknok sashia anokba sülen-a aonung piyong tsüngda menoknok ponguben anok, aser tesashiba anokbaji magnitude 5.4 liasü.

Afghanistan nung mapang shia menoknok anoker; talisa Hindu Kush mountain range nung Eurasian aser Indian tectonic plates tsüngda anoker.

Mezüng osang ajangabo, iba lendong nung nisung 600 asü ta proka liasü, ajisüaka tang tashi nung nisung 800 dak tali asüba jangjaogo aser nisung 2500 dak tali yiruogo.

Hospital tem nung yirua alirtem masemer aser mozü peria mali timtemtepdar. Sepaitemi kümzükba maparen maneni inyakdar aser taruba anogotem nung asürtem ano teimba akümtsü, ta ketdangsertemi metetdaksüogo.

Menoknok agi kongshiba tenemlen aliba tesemtem aser anentsüh aluba tesemtem nungbo kümzükba maparen inyakba nung tetsükdaksü kanga ajurur. Item ama tesem nung yirua alirtem helicopter ajanga belener.

Linük yimtiba, Kabul aser anasa aliba province tem nungi emergency medical teams aser aid workers aika lendong agi kongshiba tesemtemi yoka kümzükba aser teyari agütsüba maparen inyakdar.

Ano külen Relief agencies-i lendong agi kongshirtem nem sü-ki, blankets, chiyungtsü aser mozü lema agütsüdar.

Afghanistan nung rongsenketzüng jenjang mejungi aliba aser medical facilities junga maliba den külemi chiyungtsü agi anüngba mapang ka nung ano iba lendong atalokba ajanga nüburtem timtem ano tali bendenlokogo.

Kibong meyrjang aika ki chirepba agi aonung piyong

moapu nung dang mejangogo.

Sorkar ketdangsertemi linüktem dang teyari agüjang ta mepishiogo aser teyari agütsüba agency temi asü-amaba aser teraksatsüba asadangdar.

Iba osang angashia India Ato kilonser Narendra Modi densema linük balala nungi lenirtemi tejashi lemsatepogo.

Modi-i X ajanga, "Afghanistan nung menoknok lendong nung nisung aika asüba osang angashia jashir. Iba ama mapang ka nung onoki mangyimer kibongtem den tejashi lemsateper aser sarasademtsür. Yirua alirtem tekeraba nung aneptsü sarasademtsür. India-i akokba tashi teyari agütsütsü," ta metetdaksü.

PELABA LEMSATEPER



ASO
April 1926

ASÜ
18th August 2025

Onok akhümtong aser teti meima aliba temeim ojala **Asür.Yalipokla**, Mongsenyimti, mapang tatsüka shiranga alidang aser la akumliir wadang tembanger temulung zürepa mangyim jashi nung alidang, kija-kibong, arogo aser lokti balala kwikadi sarasadem, nübu aser rongsen agi onok den yaritepba aruogo, nenok ajak dang pelar. Nenok dangi tsüngdong arua majuruteptet nung iba zülu ajanga nenok dang pelaba lemsar. Nenok mapa tajung onoki kodanga mamatsü. Tsüngremi nenok ajak moajangma.

Temeim Chirnurtem, Semchirtem aser Kinungertem.

JANGJASHITSÜR

Tir Yimyim adok No.312, 26th August 2025 Page 7 nung Mangmetong 'A' Khel Senso Mungdang ajanga sangdongba nung 'Mr. Temjennungsang Kichu (Chungtia)' ta alibaji 'Mr. Temjennungsang Kichu (Chungtia) Kumlong Ward, Mokokchung Town, S/o Late Longkoktiba Kichu (Chungtia)' ta abensatsür.



Pakistan nung Punjab province kübok yimti ka nung tzü metsünga alidak nisung senzüba noksa nung angur. Tzümettsüng ajanga tamajungtiba kongshiba district ji Kasur lir. Punjab province nung tzümettsüng lendong nung nisung 33 süogo aser nisung lakh 7 aienhidaksüogo.

Houthi teloki Israel meyong rong dak missile khaloktsü

Sanaa, Rongjui/September 1 (Agencies): Anogo ishika tejaklen Israel-i anünglen nungi Yemen nung tesem kar amakba mapang Houthi telok Ato Kilonser aser ketdangser tejentem ishika tepsetba sülen iba telok yagi Temerem tzyüim nung tanker ka amakba nangzükogo.

Iba telok yagi Hombarnü ashiba agi, parnoki Liberia wako songer aliba Scarlet Ray rong amak aser iba rongji Israel meyong lir, ta maritime security company Ambrey-i metetdaksü.

United Kingdom Maritime Trade Operations (UKMTO) agency, shirnoki iba tesem nung rong senzusenpongba asadanger parnoki ashiba agi, Amongnü missile yagi rong dakji mekashi.

"Rong nung mena alirtemi parnok anasa mejangjaba missile ka tsükba angu aser ola tulu ka adokba apokba angashia liasü," ta UKMTO-i ashiba den külemi rong nung mena alirtem meyrir aser rong maneni jajadar, ta metetdaksü.

Houthi puri Temerem tzyüim nung rongtem maaka aruba rongnung iba ya tesusabuba amakba asütsü. Iba telok yagi

July ita nunga tanker ana tzyüim telungi angemoka yok aser Palestine nungertem pusema parnoki maneni Israel den sendaktepa aliba rongtem amaktsü, ta amokmerena metetdaksüogo.

Honibarnü Houthi teloki, Ato Kilonser Ahmed Ghaleb al-Rahawi aser tanga tongtibang ketdangsürtem Israel-i Brihostibarnü tepsetba sangdonga liasü. Ato Kilonser aser tanga ketdangsürtem den asüpila sentong Hombarnü agiogo. Houthi lenir Abdel-Malik al-Houthi-i parnok ya Yemen atema taküm bendanga agütsürtem ta ashiba den civilian

tem amakba atema Israel aija liasü.

Kasa mapang nung Amongnü Houthi telok nungi sepaitemi United Nations office maaka staff 11 soita ayuba sülen tensa mejungi aküm. Parnok ya itangitba mapa inyakba atema aija liasü.

UN-i iba taittsüba ya magizük aser parnok tangsa tang chioktsü takhangba agütsüogo. Iba telok yagi 2021 küm nungi UN nung inyaker 23 sota yua lir.

May ita Oman tiyongtsü ia United States aser Houthis na tsüngda ceasefire ka yanglu aser iba ajanga US-i anogo shia

amai Yemen amakba anena liasü.

Ajisüaka Houthi telok atema otongar Mohammed Abdulsalam-i ashiba agi, tenangzüktepba nung Israel anema jenjang agitsüba densema mali.

Israel Ato kilonser Benjamin Netanyahu-i, Israel litsü aser rongtem amakba atema parnoki taa agütsütsü, ta tekümdangtsü metetdaksüogo.

Houthi puri taoba küm October ita nunga drone aser missile amshia Israel amakba den Temerem tzyüim nung international shishilemba minpronga arudar.



September 01, 2025 nü Uzbek Tir, Shavkat Mirziyoyev China yimtiba, Beijing tonga arudang tangokba noksa nung angur. Japan anema Chinese People's War of Resistance nung takok ngur küm 80 ajungbamong sentong nung adentsü atema pai China semdanger.

Duleep Trophy: North East Zone aser Central Zone na draw asü



Dimapur, Rongjui/Sept. 1 (TYO): Tang asaya aliba Duleep Trophy quarter-final nung North East Zone cricket team-i kanga meranga asayar Central Zone team den draw süogo, kong international asayartem aika densema lir.

Asaya akoktsü atema run aika nüngdaka tanabuba innings tenzüka sülen Nagaland nungi Captain Jonathan Rongsen-i run 60 aser Mizoram nungi Jehu Anderson-ia run 64 yanglua team nem teyari tulu agütsü. Asaya tembangba tashi nung North East Zone team-i asayar 6 out sür run 200 yanglur liasü.

Central Zone ya iba asayamung akoktsü imlaba team rongnung ka lir aser parnoki mezügbuba innings nung asayar 4 out sür run 532 yangluba sülen declare asü. Team nung India nung international asayar Kuldeep

Yadav aser Deepak Chahar, na den IPL nung nüngtugu asayar Harsh Dubey nungera densema liasü. Mezügbuba innings nung North East Zone pur nem run 185 dang yangludaktsür asayar ajak out sütsüba sülen Central Zone-i follow-on benok aser tanabuba innings ya 331/7 nung declare süa target kanga tasak ka toktsü.

Ajisüaka tanabuba innings nung North East Zone batsmen temi kanga meranga asaya-a tatembangbuba anogo süitemtetogo aser iba ajanga Indian Domestic Cricket nung team tajungtiba ka den draw süteta liasü.

Nagaland Cricket Association (NCA)-i, North East Zone team nem tenüngsang agütsüogo. Iba asaya draw asüba ajanga North-East nung iba asaya maneni renlokyonga aoba sayur,

ta ashi.

Mezügbuba innings:

Central Zone: 532/4 declared (102.0 overs)

Danish Malewar double century (203 off 222)

NEZ bowler tem rongnungi Akash Kumar-i over 23 nungi run 103 agütsür wicket 2 agi.

North East Zone - First Innings: 185 all out (69.3 overs)

Karnajit Y (48 off 77) top-scorer

Central Zone - Second Innings : 331/7 declared (80.3 overs)

Shubham Sharma-i run 122 (215) yanglu

NEZ bowler tem rongnungi Akash Kumar (2/44) aser Bishworjit (2/67)

North East Zone - Second Innings: 200/6; 58.0 Overs

Jehu Anderson: 96 balls run 64; Rongsen Jonathan ball 97 run 60.

ICC-i tetsür World Cup 2025 atema senpet sangdongogo

Rongjui/September 1, 2025

(Agencies): International Cricket Council-i, India aser Sri Lanka na nung asayatsü aliba tetsür World Cup atema senpet sangdongogo koba otsüsütsüka lir.

Ajak senteper iba asayamung nung senpet USD milion 13.88 (Rs 122.5 crore approx) agütsütsü, koba 2022 küm New Zealand nung asayaba mapang USD milion 3.5 agütsüba dang nungi shilem 297 agi timba lir. Maneni taruba asayamung agütsütsü aliba senpet ya küm ana tejakdang India nung ICC Men's Cricket World Cup asayaba mapang senpet USD milion 10 agütsüba dang nungia timba lir.

13buba tetsür World Cup akokba team nem USD milion 4.48 (Rs 39.55 crore) agütsütsü, koba 2022 küm Australia nem asayamung akokba atema USD

million 1.32 dang agüja liasü.

Tanabuba jenjang nung tembangba team nem million 2.24 agütsütsü (Rs 39.55 crore) koba taoba asayamung nung England nem 600,000 agütsüba dang nungi kanga agi timba lir. Semifinal nung tamakok anguba team ana nem USD milion 1.12 (Rs 9.89 crore approx) agütsütsü aser group stage nung shilem agir ajak nem 250,000 agütsütsü. Group-stage nung asaya akokba shia USD 34,314 talila agütsütsü.

Asayamung nung pongububa aser trokbuba nung tembangba team nem 700,000 aser tenetbuba aser tibuba nung tembangba team nem 280,000 agütsütsü.

Tetsür World Cup ya September 30 nü tenzütsü. Asayamung nung mezügbuba asaya India aser Sri Lanka na Guwahati nung asayatsü.

US Open: Alcaraz, Djokovic, Sabalenka nunger quarter-i iogo

Rongjui/September 1, 2025

(Agencies): Tang asaya aliba US Open 2025 nung Deobarnü Carlos Alcaraz, Novak Djokovic, aser Aryna Sabalenka nunger ajaki pei tata asaya koka quarter-finals-i iogo.

Spain nunger second seed asayar Carlos Alcaraz-i Deobarnü France nunger asayar Arthur Rinderknech straight sets nung kokogo aser maneni kokyonga tura pa semi nung Novak Djokovic den asayatsü.

2022 US Open champion yagi mezügbuba set nungbo kanga meranga asayatsüsa aküm ajisüaka iba sülen tajungba asayateta 7-6 (7/3), 6-3, 6-4 agi asaya koka liasü.

Alcaraz shiba arishi küm 22 dang lir saka Grand Slam pongu tashi benogo, pa Mongolbarnü Czech nunger Jiri Lehecka den asayatsü. Lehecka-i 7-6 (7/4), 6-4, 2-6, 6-2 aser France nunger Adrian Mannarino kokogo. Pa tang agi tanabenbuba Grand Slam quarter-final kati iogo.

Tebur kija asaya nungsa Grand Slam 24 ben koker alisang Djokovic-i Germany nunger qualifier Jan-Lennard Struff kokogo.

Arishi küm 38 tain Djokovic-i iba asaya ya 6-3, 6-3, 6-2 agi ghonda ana majung dang koka Grand Slam nung quarter-final 58buba tongtetogo.

Pa taruba asaya Taylor Fritz den asayatsü. Iba asayamung



Aryna Sabalenka

nung America nunger rongnungi tebur kija asaya nung Fritz kija anunga lir.

Fritz-i round of 16 nung Czech nunger 21 seed asayar Tomas Machac 6-4, 6-3, 6-3 agi ayong ayonga koka liasü.

Kasa asayamung tetsür kija asaya nung World No. 1 aser defending champion Aryna Sabalenka-i 6-1, 6-4 agi unseeded Spian tsür Cristina Bucsa koka quarter-i iogo.

Belarus tsürla ya iba asayamung nung taruba round tem nung America tsür Jessica Pegula den asayatsü, shibai külem America tsür Ann Li 6-1, 6-2 agi kokogo.

Tetsür kija asaya nungsa Barbora Krejčíková-i 1-6, 7-6 (15/13), 6-3 agi America tsür Taylor Townsend kokogo aser la quarter-final nung Pegula den asayatsü.

Bayer Leverkusen-i coach Erik Ten Hag mapa nungi anentsüogo



Rongjui/September 1, 2025

(Agencies): Bayer Leverkusen-i season tasenba nung asaya ana dang asayba sülen manager Erik Ten Hag mapa nungi anentsüba Hombarnü sangdongogo.

Ten Hag ya taoba küm October ita Manchester United-i mapa nungi anentsü aser Xabi Alonso shiba Real Madrid-i ao pa melena Leverkusen nung dena liasü.

"Iba telemtetba agitsü temela masü asü. Shingaia iba jenjang ya maginer," ta sporting director Simon Rolfes-i ashi.

"Taoba hopta ishika ajanga takok angutsü atema team tasen ka yanglutsü asoshi jenjang agiba ya meshitak ta ngutetogo,"

ta Rolfes-i ashi.

Club CEO Fernando Carro-i ashiba agi, "iba telemtetba agitsü tasak saka nüngdaka liasü."

Pa mapa nungi anentsüba ya Bundesliga nung coach ka mapa nungi takaratiba anentsüba kümogo. Ten Hag, shiba 2022 küm United manager asütsü shim, pa lenisüba nung club-i FA Cup aser League Cup akok, saka 2024-25 season nung asaya ti nungi ka dang akokba sülen pa mapa nungi anenja liasü.

Leverkusen puri 2023-24 season nung mezügbuba Bundesliga title abenba den league nung khen danga tamakok mongui asayaba sülen

maneni takok ngua asayayonga aoba mapang ka nung Ten Hag iba club nung aden.

Taküm summer transfer window nung Florian Wirtz, Granit Xhaka, Jonathan Tah, Jeremie Frimpong, Amine Adli, aser Lukas Hradecky nunger amala asayar tongtibangtemi club toktsüba sülen club yanglushitsü pa nem nonlokja liasü.

Leverkusen-i Ten Hag melentsüpur sangdonga mali aser ashiba agi, assistant coaching staff temi achaayanga training agia atatsü.

Ten Hag indang tenure ya July 1 nü tenzüc aser mezügbuba asaya nung parnoki goal 5-1 agi Flamengo indang under-20s team makok. Iba sülen parnoki German Cup opener nung fourth-tier Sonnenhof Grossaspach goal 4-0 agi akok. Ajisüaka Bundesliga nung parnoki mezügbuba asaya kidang 2-1 agi Hoffenheim makok aser tanabuba asaya nunga Werder Bremen den goal 3-3 agütsür tembangba liasü. Asaya nung parnok goal 2-0 aser 3-1 agi tejakdang liasü saka parnoki Werder Bremen nem goal asemprongla küptokdaksü, shirnok asayar 10-i dang asaya tembangba liasü.

BILEMDANGANG

"Anogoshia langka tasen angazüktsü merangang."